

# Ahli abai seruan perpaduan PM ditegur

UM 20 JUN 2003

KUALA LUMPUR 19 Jun — Seruan ke arah perpaduan yang sentiasa ditekankan oleh Presiden UMNO, Datuk Seri Dr. Mahathir Mohamad demi keutuhan parti, bangsa dan negara sentiasa diabaikan kerana keghairahan untuk menjadi pemimpin.

Pengerusi Badan Perhubungan UMNO Kedah, Datuk Seri Syed Razak Syed Zain berkata, terdapat ahli UMNO gagal untuk menghayati amanat Presiden sehingga suatu ketika parti pernah berada dalam keadaan goyah apabila dilanda beberapa krisis besar.

“Selain krisis politik 1987, pengharaman UMNO pada tahun 1988 hampir memadamkan jasa dan sumbangan UMNO sebagai institusi unggul umat Melayu dan Islam di negara ini,” ujar beliau.

Beliau menyatakan demikian ketika membahaskan usul ucapan terima kasih atas ucapan dasar Presiden,

pada perhimpunan Agung UMNO ke-54 di Pusat Dagangan Dunia Putra hari ini.

Bagaimanapun, katanya, berkat pengalaman, pengamatan, kebolehan dan ketajaman fikiran membolehkan

Dr. Mahathir menghadapi segala pahit getir cabaran kepimpinan yang melanda.

Dalam keadaan perjuangan yang masih belum selesai, beliau berkata, seluruh ahli harus merelakan pengunduran Dr. Mahathir kerana setiap apa yang berlaku akan ada hikmahnya.

Syed Razak berkata, suntikan semangat dan kegigihannya menjayakan matlamat parti, membela bangsa dan membangunkan negara akan terus menjadi dorongan kepada seluruh ahli.

Katanya, dengan menamakan Datuk Seri Abdullah Ahmad Badawi selaku pengganti, Syed Razak menyifatkannya sebagai pemilihan yang tepat kerana Abdullah dengan sifatnya yang sederhana dan mengutamakan rakyat bawahan mampu meneruskan kesinambungan.

“Kekuatan neribadi, nilai moral dan akhlak yang tinggi yang diwarisi bakal

menggemilangkan obor perjuangan UMNO dan kepimpinan negara seluruhnya dengan pendekatan mesra rakyat.

Bagaimanapun, katanya, Abdullah akan berdepan dengan kemelut dilema bangsa yang masih belum berakhir dan merupakan suatu cabaran besar yang perlu dipikul.

“Hasutan membenci pemimpin, mengadu domba, memfitnah sesama saudara masih merupakan dilema Melayu yang berterusan. Meskipun begitu siapakah di antara kite yang memahami dan sanggup bersama presiden parti untuk membaiki sepanjang 22 tahun kepimpinannya,” ujarnya.

Beliau berkeyakinan akan terus berusaha merubah dilema itu kerana dirinya mempunyai kekuatan tasawwur Islam yang kukuh.